



Fernand ETGEN
President vun der
Deputéiertechamber
19, um Krautmaart
L-1728 Lëtzebuerg

Lëtzebuerg, den 10/03/2021

Här President,

Sou wéi den Artikel 83 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Famill an Integratioun & Interieur weiderzeleeden.

Schwiereg finanziell Situatioune féieren dozou, dass verschidde Biergerinnen a Bierger hier Wunneng verlosse mussen. Virun allem an Zäite vun ëmmer steigende Wunnpräisser kënnt dëst net seele vir.

Déi Betraffe kënnen an deem Fall beim Office Social an hirer Gemeng no Hëllef froen. Den Office Social kann den Demandeur dann un eng Organisatioun weiderleeden, déi Logementer zu soziale Konditiounen zur Verfügung stellt, déi de Persounen als Iwwergangsléisung déngen.

Mir ass zougedroe ginn, an dat méi wéi eng Kéier, dass d'Beneficiairë vun esou Wunnengen an hirem Mietkontrakt verbuede kréien Hausdéieren an dëser Wunneng ze halen. Dës Bedéngung stellt vill Locatairë virun ee schreckleche Choix: fir d'Wunneng kënnen an Usproch ze huelen, muss d'Hausdéier entweder bei Kolleegen oder Frënn ënnerkommen, an een Déierenasyl goen, ausgesat ginn oder et gëtt am schlëmmste Fall dout gemaach .

Objektiv gesinn ass et zweifelhaft, ob Hausdéieren an enger Wunneng automatesch dozou féieren, dass den Zoustand vun dëser sech verschlechtert. Am Normalfall gëtt am Locatiounskontrakt souwisou festgehalten, dass d'Wunneng an deem Zoustand muss zeréckgelooss ginn, an deem se an Usproch geholl gouf.

An deem Zesummenhang wéilt ech de Ministeren dës Froe stellen:

1. Dierfe Propriétaires vu Wunnengen, déi iwwert een Office Social oder engem vu senger Sozialpartner vermittelt ginn, Locatairë mat Hausdéieren ofweisen?
2. Wäert d'Regierung sech dofir asetzen, dass d'Locatairen an Zukunft mat hiren Hausdéiere kënnen a Sozialwunnenge wunnen? Falls jo, wäerten d'Ministeren ee Gespräch mam Secteur sichen, fir eng Léisung heizou ze fannen?



www.piraten.lu

Mat déiwem Respekt,

A handwritten signature in black ink, consisting of several fluid, overlapping strokes that form a stylized representation of the name 'GOERGEN'.

GOERGEN Marc
Député

